

Monday, October 13, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

SAIRANG REL

Sairang a rel a luh hnuah Mizoramah khualzin an pung nasa hle a, sum vei vak a pun phah niin hemi chungchang hrechiantuten an sawi.

Vawiin hi Sairanga rel a lo luh atanga thla 1-na chiah a ni a, Akashvani Aizawl zawhna chhangin Hotel Jay Jay, Falkland Veng, Aizawl neitu Pu Jarvis Lalramnghaka Chhakchhuak chuan September ni 13-a Sairang rel a service tan atang khan an Hotel a mikhual thleng zat chu a letin an pung tih sawiin, an room neih zatah pawh an leng lo fo a ti a, state pawn atanga khualzinte chuan Mizoram nuam an ti hle tih sawiin, relrawn lut chu Hotel neitute chauh ni lovin mi tam takin an tangkaipui a ti a, Mizorama tlawh tur hmun hrang hrangah te tlawhtu an tam phah a, taxi leh lirthei hmanga eizawngten an tangkaipui a, khualzinten Mizo thil an ei chak avang leh Mizoram thil hawn an duh thin avangin thingpui dawr leh Bazar-a sumdawngte pawhin an hlawkpui hlea a rin thu sawiin, tunhmaa khawlaia sum vei vak tlem thin chu rel service hnuah a pung hluai nia a hriat thu a sawi a ni.

Byte: Hotel Jay Jay Owner Jarvis

Sairang Rel Station ILP counter atanga Akashvani thu dawn danin, September ni 13 atanga vawiin October ni 13 thlengin Sairang rel stationah ILP 5154 pek chhuah a ni tawh a, Guwahati - Sairang Express a chuangte zingah ILP pekchhuah a tam ber a ni.



THINGTAM

Thingtam avanga sazu puang hrai runpui neih mek anih avangin, mipui an himtlan zawkna turin Sazu/Chepa leh Sava lam chi reng reng, a rep emaw a sa emaw, a thi leh a dam pawh zawrh khap a ni.

Hemi zulzui hian District Magistrate ten thuchhuah an siam a, Lawngtlai District huamchhungah pawh Sazu a puang nasa a, Agriculture Department ten theihtawp chhuahin Sazu hrai runpui (Mass Poisoning) an neih bakah Sazu tur te sem a ni a, Sazu hrai hi mihring tan a hlauhawm avangin mipuite him zawk nan Sazu/Chepa leh Sava lam chi reng reng, a rep emaw a sa emaw, a thi leh a dam pawh zawrh khap a ni a, district dang atanga lak pawh khap a ni bawk a ni.

Thingtam chungchanga kan corr reprot lo ngaithla ang.

VC

Thingtam lo thlengah hian district 11-a khaw 130 vela loneitu mi 4,000 vel thlawhhma chu sazu puangin a tichhe nasa hle a. Thlawhhma lakna ram hectare 6,869 chuanga hectare 1,737 velah sazu hian buh leh thlai a seh a. Tai (buh thar-rang) leh buhpui an seh nasat ber laiin vaimim, fu, behlawi, sawhthing, bawkbawn,

hmarcha, mai, chhawhchhi leh fanghma te an tichhe tel bawk a ni. Sazu tur hi Bromadiolone leh Zinc Phosphide te an hmang ber a, chuti chungin district thenkhatah chuan duh khawp hman tur a awm lo ni a sawi a ni a. Hei bakah hian sazu thahna atana Mizote'n an hman tlanglawn sairawkherh bakah thang chi hrang hrang - vaithang, mangkhawng leh thangchep te hman a ni bawk a. Agriculture department hnathawkte chuan sazu-in an hriat theih loh na'n thang chi hrang hrangte hi hman thlak thin turin kuthnathawktute an zirtir a ni.



TRUCKERS

Mizoram chak lakluhna kawngpui chu lirthei zawh hleihtheih loh khawpin a chhiat leh nasat tawh avangin siam tura nawrna thawm a ring leh tan tawh hle a,

Kan corr thudawn danin, Kawnpui leh Sairang inkar kawng hi inrinni khan PWD Engineer in Chief hoin endik a ni a, NHIDCL leh BR Goyal lam pawh an tel a, lung chang tha dah belh a, hnathawh dan tur an ruahman a ni.

Bairabi Road lam ah pawh Kolasib lam atanga boulder phurh thlak niin Zero point leh Pangbalkawn inkar pawh Roller pakhat leh JCB hmanga a kaw zau lai thawm hna thawh mek niin an sawi a ni.

Puan tawh angin, Kolasib district a lirthei hmanga eizawng pawl hrang hrangte chuan Vairengte leh Sairang leh Kolasib leh Bairabi inkar kawng chhe lutuk chu sorkar thuneitute'n October ni 19 thlenga an la siamthat loh chuan he lai kawnga tlan tawh loh an tum.

Mizoram Tipper Association (MTA) Kolasib district leh Kolasib District Drivers' & Owners' Joint Action Committee te chuan Inrinni khan thu an chhuah a. Chu tah chuan Mizoram chaklakna ber Vairengte leh Sairang inkar leh Kolasib leh Bairabi inkar kawngpuite chu lirthei tana zawh hlauhawm khawpa chhia, vanduaina thleng thei a ni, an ti a. Lirthei khalhtute'n harsatna namen lo an tawh mek niin an sawi. He lai kawng pawimawh tak hi siamtha thuai turin ziakin Kolasib bawrhsap hnenah Inrinni khan an thlen a, a copy hi Kolasib district SP leh Kolasib a National Highway Division EE te an pe bawk a. Lehkha-ah chuan tun leh October ni 19 inkar chhunga kawngpuite hi siam that a nih loh chuan an lirtheite an tlan tawh dawn loh tur thu an zia a ni. Kar kal ta lama ruah sur nasa avang khan he lai kawng chhe tawh sa hi a chhe leh zual hle a. Lirthei tlu leh tang a tam hle ni a thudawn a ni.

He tih lai hian nimin lam khan Kawnpui atanga Aizawl lam pan lirthei 578 chhuah a ni a, Sairang peng leh Mualkhang/Kamrang inkar atanga phai lam kal tur chhuah a awm lova. Khamrang-ah phai lam pan tur lirthei 263 a tangkhang mek a, Aizawl lam pan tangkhang a awm lo. Mizoram Truck Drivers' Association (MTDA) hruiatute sawi dan chuan kar kalta laihawl vela ruahsur avang khan Sairang leh Kawnpui inkar kawng chhia lutuk hi a nal zual hle a. Truck ruak thenkhat kal thei lovin tlu leh kawng nala tang an awm tam hle a ni.

MTDA president Pu H Laldinglana chuan vawiin hian an pawl hruiatute an inhmukhawm tur thu a sawi a. Tun hnai a kawngpui dinhmun an enin a chhiat leh nasat tawhzia an zu hmu tih a sawi a. Kolasib a lirthei a eizawng pawl pahnihte thutlukna hi an zawmpui ve leh ve loh tur chu vawiinah thutlukna an siam dawn thu

leh hetiang thilah chuan tan rual zel ni se tih chu a thuphunga thu dah a awm thu a sawi a ni.



GST

Prime Minister Narendra Modia’n GST dan thar a siam chuan ramchhung mipui te ah hlawkna a thlen zel a,

Himachal Pradesh a kut hnathawktute, loneih a eizawng te leh thil siamchhuahna hmun ah te hmasawнна a thlen mek a, he dan thar hian puan siam chhuak tute ah chhiah lak ti hniam in chu chuan puan siamchhuak tute ah phurna thlen in, inhralh leh siamchhuah lam ah hlawkna a thlen nasa hle a, tualchhung thil siam chhuah kawng ah pawh hma nasa tak a sawn in Himachal chu sumdawнна kawng a hmasawнна kawng nasa takin a in hawng dawn a ni.



GAZA

Gaza-a indona tihtawp a nih theihnan a ram aiawh te inbiakna chu vawiin hian Egypt ah neih a ni dawn a, Egypt President Abdek Fattah al Sisi leh US President Donald Trump ten he meeting hi an kaihruai dawn a, ram 20 chuang hrulaitute an tel beisei a ni.

He inhmukkhawmna ah hian Gaza indona tihtawp chungchang te, ram venhim na chungchang te leh remna leh muanna tur a hmalak na te ngaihtuah a ni dawn a ni. UN Secretary General Antonio Guterres pawh tel tur a beisei niin India ram aiawh in Environment, Forest and climate change Minister Kirti Vardhan Singh chu he meeting ah hian a tel dawn a ni.

